



Minister Dr. Richard Visser

Inversion grandi den mas y miho cuida medico

Proyecto di ampliacion y renobacion di Hospital ta bira un realidad

DESPUES cu e proyecto pa renobacion y ampliacion di Dr. Horacio Oduber a keda aproba den Parlamento, Minister di Deporte y Salubridad, Dr. Richard Visser ta yama danki na tur esunnan cu a haci e proyecto aki bira un realidad. Ta hopi aña a pasa pa asina awe por bisa cu nos centro hospitalario lo haya un upgrade den tur sentido di palabra. No solamente pa loke ta e parti di renobacion y ampliacion di e infraestructura sino tambe den loke ta e parti di servicio.

Minister Richard Visser ta yama danki na e diferente teamnan cu a traha den e desaroyo di e proyecto. E 80% di trabou pa e renobacion y expansion di e hospital ta encera e preparacion y diseño di e proyecto. Awor loke falta ta cuminsa físicamente cu e trabounan. E participacion mes y envolvimento di e dokternan, enfermeronan, empleadonan di e diferente departamentonan di HOH tabata sublime y sigur

e entusiasmo aki lo wordo ripara den e proximo fasenan cu ta bin pa loke ta e realisacion di e proyecto. Nan contribucion ta hopi valioso y primordial pa por hiba Aruba na un proximo paso den loke ta cuida medico di calidad den servicio y den avance tambe den uzo di tecnologia y infraestructura.

E mandatario tambe ta expresa palabranan di aprecio pa proyectonan cu ya a mira luz di dia den Dr. Horacio Oduber Hospital y cu ta demostra cu hunto por logra esaki y hopi mas pa nos isla. Minister di Deporte y Salubridad Dr. Richard Visser finalmente ta encurasha gerencia

di Hospital y henter e personal pa sigui cu e tipo di proyectonan aki na bienestar di nos comunidad.

